

Stichting Monumentenfonds cu proyecto di restauracion na Koningstraat 29

* Rancho ta un barrio rico na Historia y Cultura



ORANJESTAD (AAN): Diamars Stichting Monumentenfonds Aruba (SMFA) a anuncia un proyecto di renovacion di Koningstraat 29.

Segun directora di e stichting, ir. Anne Witsenburg de Jong, esaki ta un proyecto hopi special pa SMFA, pasobra ta e prome proyecto, den cual propietario di e monumento (cas), ta duna placa na e fundacion, pa e restaura e edificio.

Despues e persona ta keda propietario, pero e fundacion ta yude den e proceso.

Banda di esaki ta asina cu yiu homber di e propietario esta Albert Burgers, ta hasi su stage na SMFA.

E cas ta inclui un cas chikito tambe di Torto.

Segun sra. de Jong, pa

e fundacion ta importante pa mantene historia di e edificionan monumento.

El a splica cu e Koningstraat tabata e caya principal di Aruba, si bo kier a cumpra algo antes den tempo cu economia tabata florece.

Tur hende tabata bay den e caya ey pa hasi compras.

“E casnan den e caya tin un historia grandi, pues pa nos ta importante pa pone atencion riba esaki y muestra cu rancho no ta solamente un barrio cu ta conoce su problemanan, sino cu e ta un barrio rico na Cultura y historia” segun de Jong.

Loke e fundacion ta

hasi tambe ta documenta ken tabata propietario di e casnan, con e estilo di construccion tabata etc.

Albert Burgers kende ta core stage na e fundacion a hasi un investigacion riba con por restaura e edificio na un manera duradero.

Henter e proyecto ta bay wordo hasi hunto cu ‘Stichting Rancho’.

Durante e conferencia di prensa, Burgers a splica cu su tata tabata biba na Republica Dominicana, pero el a cumpra e cas alrededor di 2 aña pasa.

E estudiante di Bouwkunde na Delft a splica cu e intencion ta awor pa e restauracion hasi cu e cas bira un ehempel den Rancho.

Ir. De Jong a splica cu den prome instancia e cas di Torto cu ta parti di e propiedad, por wordo uza como un tienda di batido, mientras cu hendenan por huur e cas pa biba aden.

